

## A N U N C I O

Non producíndose reclamacións á modificación da Ordenanza Xeral da Protección Medio Ambiental do Concello de Marín é considerándose aprobada definitivamente, publícase no Boletín Oficial da Provincia o texto íntegro en cumprimento do preceptuado no artigo 70.2 da Lei reguladora de Bases de Réxime Local, entrando en vigor unha vez transcurrido o prazo de quince días previsto no artigo 65.2 da Lei 7/1985 de 2 de abril.

**ORDENANZA XERAL DE PROTECCIÓN MEDIO AMBIENTAL DO CONCELLO DE MARÍN***Título Preliminar*  
*Disposicións Xerais**ARTIGO 1.*

A presente Ordenanza ten por obxecto a regulación, no termo municipal de Marín, das seguintes actividades:

- a) A limpeza das vías e espazos de dominio e uso público no termo municipal.
- b) A recollida de residuos sólidos urbanos e o seu tratamento.
- c) As normas xerais sobre protección medio ambiental fronte actividades xeradoras de po, fumes, líquidos e outros elementos de contaminación.
- d) As actividades de publicidade ou propaganda en espazos públicos.
- e) Normas a seguir para a hixiene e mantemento das praias.

*ARTIGO 2.*

1. No non regulado expresamente na presente ordenanza será de aplicación o disposto na Normativa Estatal e Autonómica sobre recollida de desperdicios e residuos sólidos urbanos, lexislación sobre protección de animais domésticos, normativa de protección ambiental e demais disposicións aplicables.

2. A presente Ordenanza terá carácter xeral respecto das normas municipais especiais que o Concello poida establecer para sectores específicos de actividades con incidencia no eido medio ambiental, aplicándose, en todo caso, con carácter supletorio, no non previsto nas ditas normas.

*Título I**Da limpeza e ornato das vías e espazos públicos e dos inmobles en xeral**Capítulo I**Da limpeza da vía pública**ARTIGO 3.*

1. A limpeza das vías e espazos de dominio e uso público local corresponderá ó Concello, constituíndo un servizo público municipal que se prestará a través de calquera dos modos de xestión establecidos na lexislación vixente.

2. A limpeza das rúas e solares de dominio privado deberá efectuarse polos seus propietarios seguindo as directrices que dicten os servizos técnicos do Concello. No caso no que a propiedade non cumpra debidamente con esta obrigação previa orde de execución, a limpeza será efectuada polo servizo Municipal correspondente, e dita propiedade estará obrigada a pagar o importe dos servizos prestados, dacordo ao establecido na Ordenanza reguladora dos Dereitos e Tasas correspondentes.

3. A limpeza das vías e espazos libres de titularidade doutras Administracións Públicas corresponderá ós seus titulares.

*ARTIGO 4.*

1. Corresponderá ós propietarios ou se é o caso a quen habite os inmobles manter limpos os de mazá, os cerres de baixos, a limpeza de pintadas en edificios e o lucido das casas e baixos das mesmas. Enténdese incluída nesta obriga a realización das operacións de desratización, desinsectación ou desinfección que sexan precisas para manter as condicións normais de salubridade e hixiene dos inmobles.

Esta obriga será igualmente esixible cando a situación de falta de limpeza sexa imputable a terceiras persoas, sen os prexuízos do dereito dos propietarios a denunciar os feitos ante o Concello, para os efectos de que este poida exercer a potestade sancionadora fronte ós responsables.

2. Queda expresamente prohibido que as persoas que realicen a limpeza dos locais, portais ou edificios, boten ás beirarrúas ou calzada os restos ou desperdicios procedentes dos interiores.

Queda tamén prohibido o baldeo con auga, xabón ou lixivia da limpeza de vehículos, locais ou vivendas e espazos públicos. Queda nembargantes autorizado o baldeo con auga limpa ou con calquera outro produto non tóxico cando sexa preciso retirar excrementos, vómitos ou calquera outro residuo molesto fronte a locais ou vivendas, que en todo caso deberá realizarse de xeito directo no sumidoiro máis próximo, evitando en todo momento a produción de molestias a terceiros.

3. Prohíbese o depósito en pozos, rexistros e na rede de sumidoiros de calquera produto ou residuo resultante de actividades de limpeza ou doutros de calquera tipo non autorizado tales como animais mortos, restos químicos, aceites de cociña ou outros.

*ARTIGO 5.*

1. Prohíbese botar á vía pública todo tipo de residuos como cabichas, pelas, papeis, bolsas ou calquera outro desperdicio similar. Quen transite polas rúas, prazas, xardíns e outros espazos libres públicos e queira desprenderse de residuos de pequena entidade, como os anteriormente mencionados, utilizará as papeleiras instaladas para tal fin.

2. Prohíbese, así mesmo, chimpas calquer tipo de residuos dende vehículos, xa en marcha ou parados.

3. Os usuarios deberán absterse de toda manipulación sobre as papeleiras, movelas, envorcalas ou arrincalas, así como calquera outro acto que deteriore a súa presentación ou as faga inutilizables para o uso a que están destinadas.

4. A instalación, mantemento e reposición das papeleiras realizarase ben pola Administración Municipal ou mediante xestión indirecta.

5. Os danos causados ás papeleiras, que signifiquen a necesidade da súa reposición, serán sufragados polos que os ocasionasen, sen prexuízo da esixencia

das responsabilidades de tipo penal ou administrativo que procedan.

6. Os danos que se causen en árbores ou noutro mobiliario urbano ou en calquera

espacio ou ben público, incluíndo a realización de inscricións ou pintadas e a colocación de carteis ou adhesivos, serán así mesmo sufragados polas persoas que os ocasionasen, sen prexuízo da esixencia das responsabilidades de tipo penal ou administrativo que procedan.

*ARTIGO 6*

Queda prohibido realizar calquera operación ou actividade que poida luxar as vías e espazos públicos, o mobiliario urbano e en particular:

- a) Lavar vehículos ou facer operacións de limpeza nas vías ou espazos públicos así como realizar operacións de cambio de aceite ou doutros líquidos.
- b) Manipular ou seleccionar os desperdicios ou residuos sólidos urbanos situados nas papeleiras e nos contedores do lixo, producindo a súa dispersión, dificultando a súa recollida ou alterando os seus envases. Tamén se prohíbe o depósito de residuos domésticos nos recipientes situados

nas rúas e que estén destinados exclusivamente a recoller os residuos procedentes da limpeza viaria.

- c) Sentarse apoiando os pés nos bancos e cadeiras situados nos espazos públicos.
- d) Sacudir ou limpar prendas, alfombras ou similares nas vías e espazos públicos ou sobre as mesmas (dende xanelas, balcóns, etc.).
- e) Instalar tendais e tender roupa nas fachadas dos inmobles que den ás vías ou espazos públicos. Exceptúanse aquelas vivendas que, pola súa antigüidade ou características singulares, non dispoñan de espazos interiores para tal fin, polo que poderán facer uso da fachada entre as 22:00 e as 08:00 horas, sen que en ningún caso se poida tender a unha altura que perturbe o paso dos viandantes e sempre que non se produzan molestias, tales como as derivadas do goteo de auga ou similares.
- f) Prohibese o estacionamento de vehículos en zonas donde estean ubicados contedores e que impidan o acceso aos mesmos, por parte do servizo de limpeza, adoptando a Oficina Municipal de Tráfico as medidas ao efecto. O seu cumprimento será vixiado pola Policía Municipal.
- g) As persoas que conduzan cans deberán impedir que estes realicen as súas dexeccións nas vías e espazos públicos. O Concello poderá habilitar zonas específicas para o efecto.

No caso de que as dexeccións queden depositadas en calquera lugar público, dentro do núcleo urbano e fóra dos lugares habilitados para tal fin, se os houbera, a persoa que conduza ó animal estará obrigada á recollida e limpeza das dexeccións que, debidamente empaquetadas, serán depositadas en papeleiras ou contedores de lixo.

Do incumprimento do establecido neste artigo serán responsables as persoas que conduzan ós animais, sexan ou non propietarios dos mesmos, e subsidiariamente os propietarios dos mesmos.

#### ARTIGO 7.

1. Quen estea á fronte de quioscos ou postos autorizados nas vías ou espazos públicos ou desenvolva calquera outra ocupación ou actividade na mesma, ben sexa de xeito illado ou en mercadiños, está obrigado a manter limpo o espazo no que desenvolva o seu cometido e as proximidades durante o horario en que realice a súa actividade e a deixalo no mesmo estado de limpeza unha vez finalizada esta. O incumprimento deste artigo poderá dar lugar á revogación da correspondente licenza, previa audiencia do interesado.

2. A mesma obriga incumbe ós donos de cafés, bares e establecementos análogos, en canto á superficie da vía ou espazo libre público que se ocupe con veladores, cadeiras, etc. así como á beirarrúa correspondente á lonxitude da súa fachada, debendo retirar todo tipo de envases, plásticos, papeleiras, etc., no momento do peche do establecemento. Os donos ou responsables de locais públicos tales como pubs, bares, discotecas, restaurantes ou análogos no momento do peche do establecemento deberán retirar da vía pública situada nas inmediacións do mesmo calquera residuo derivado da actividade desempeñada, incluíndo cristais, calquera tipo de envase, etc.

#### ARTIGO 8.

1. Acabada a carga e descarga de calquera vehículo con observancia das normas que para tales actividades establece a normativa de circulación, procederase a limpar as beirarrúas e calzadas que fosen luxadas durante a operación, retirando da vía pública os residuos vertidos.

2. Están obrigados ó cumprimento desde precepto os donos dos vehículos e, subsidiariamente, os titulares dos establecementos ou fincas nos que fose executada a carga ou descarga, sempre que non faciliten a identificación do transportista.

#### ARTIGO 9.

1. Os propietarios e conductores de vehículos que transporten terras, cascallos, materiais poeirentos, áridos, formigón, cartóns, papeis ou calquera outra materia susceptible de causar molestias ou luxar os

espazos públicos ó ser transportada terán que tomar cantas medidas sexan precisas para cubrir tales materiais durante o transporte e evitar que, por efecto da velocidade do vehículo ou do vento, caia sobre á vía pública auga, po ou parte dos materiais transportados.

2. Nos vehículos que se utilicen en zona de obras, antes de saír á vía pública, deberá procederse, a ser posible, ó lavado dos baixos e rodas. En todo caso, manterase a vía pública limpa retirando da mesma calquera residuo derivado da actividade e deberá garantirse que en ningún tramo do percorrido queden restos de materiais.

#### ARTIGO 10.

Nas obras nas que se produzan cantidades de cascallos superiores a un metro cúbico haberán de utilizarse para a súa recollida contedores axeitados, para os que se contará coa preceptiva autorización municipal, para seren trasladados posteriormente ó vertedoiro de inertes.

#### ARTIGO 11.

1. Cando se realice a limpeza de escaparates, portas, marquesiñas, toldos ou cortinas dos establecementos comerciais adoptaranse as debidas precaucións para non causar molestias ós transeúntes nin luxar a vía pública e se, non obstante, esta se luxase, os donos do establecemento estarán obrigados á súa limpeza, retirando os residuos resultantes.

2. Cando se proceda a limpeza de balcóns e terrazas, así como á rega das plantas instaladas nos mesmo, adoptaranse as debidas precaucións para non luxar a rúa e recoller a auga restante do rego.

#### ARTIGO 12.

1. A colocación de valos publicitarios, carteis, pancartas e adhesivos requerirá en todo caso autorización e non se permitirá a colocación de elementos publicitarios sen autorización en:

Espazos libres públicos e elementos de mobiliario urbano.

Postes de iluminación, semáforos e sinais de tráfico.

Muros, valos e cercas, a excepción de lugares habilitados para tal fin.

De modo provisional e en ocasións excepcionais como feiras, festas, exposicións ou congresos, o concello poderá autorizar anuncios non comerciais limitados ó tempo que dure o acontecemento, que de inmediato deberán retirarse unha vez que acabe o mesmo.

### *Título II*

#### *Da protección de zonas verdes*

### *Capítulo I*

#### *Implantacións de zonas verdes.*

#### ARTIGO 13.

1. Para os efectos de esta ordenanza considéranse zonas verdes os espazos destinados á implantación de arboredo e xardinería.

2. Serán consideradas como zonas verdes, para os efectos desta ordenanza, as prazas e xardíns públicos, os xardíns arredor de monumentos ou nas illas viarias, as aliñacións de árbores en beirarrúas e paseos e as xardineiras e elementos de xardinería instalados nas vías públicas.



*Capítulo II**Conservación de zonas verdes**ARTIGO 14.*

Tódolos propietarios de zonas verdes están obrigados a mantelas en bo estado de conservación, correndo pola súa conta os gastos que iso ocasione.

*ARTIGO 15.*

Calquera propietario dun inmovible con fachada á rúa e árbores no mesmo terá a obriga de poda-los de xeito que non obstrúan ou dificulten a iluminación da vía pública ou impidan a visibilidade en cruces, interseccións ou pasos.

*ARTIGO 16.*

1. Os regos precisos para a subsistencia dos vexetais incluídos en calquera zona verde, deberán realizarse cun criterio de economía da auga, en concordancia co mantemento ecolóxico do sistema que favoreza a resistencia das plantas en períodos de seca, empuxes de vento, ataques de criptógamas, etc..

2. A zona verde que posúa recursos propios de auga será regada con estes recursos sempre que isto sexa posible.

*ARTIGO 17.*

Os titulares de quioscos, bares, etc., que integren nas súas instalacións algún tipo de plantación, deberán velar polo bo estado das mesmas.

*Capítulo III**Uso das zonas verdes**ARTIGO 18.*

Tódolos cidadáns teñen dereito ó uso e aproveitamento das zonas verdes públicas, de acordo co establecido na presente ordenanza e demais disposicións aplicables.

*ARTIGO 19.*

Nos lugares calificados como bens de dominio e uso público, non poderán celebrarse actos que pola súa finalidade, contido, características ou fundamento presupoñan a utilización de tales recintos con fins particulares en detrimento da súa propia natureza e destino.

*ARTIGO 20.*

Cando por motivos de interese se autoricen nestes lugares actos públicos, deberanse toma-las medidas previsorias necesarias para que a maior afluencia de

persoas os mesmos non cause detrimento nas plantas e mobiliario urbano, En todo caso, tales autorizacións deberán ser solicitadas coa antelación suficiente para adopta-las medidas previsorias necesarias.

*ARTIGO 21.*

1. Os usuarios das zonas verdes e do mobiliario urbano instalado nas mesmas, deberán cumprir-las instrucións que sobre a súa utilización figuren nos indicadores, anuncios, rótulos e sinais existentes, e se faltaran estes apelárase a racionalidade e boas maneiras.

2. En calquera caso deberán atende-las indicacións que formulen os axentes da Policía Municipal e o persoal de Parques e Xardíns-

*Capítulo IV**Protección de elementos vexetais**ARTIGO 22.*

Con carácter xeral, para a boa conservación e mantemento das diferentes especies vexetais das zonas verdes, non se permitirán os seguintes actos:

- a) Toda manipulación realizada sobre as árbores e plantas.
- b) Camiñar polas zonas axardinadas acoutadas.
- c) Pisa-lo céspede de carácter ornamental, introducirse no mesmo e utilizalo para xogar, repousar ou deitarse sobre el.
- d) Cortar flores, polas ou especies vexetais.
- e) Talar, apear ou podar árbores situados en espazos públicos sen a autorización municipal expresa.
- f) Aclarar, arrincar ou partir árbores, pelar ou arrinca-las súas cortizas, cravar puntas, atar os mesmos escaleiras, ferramentas, soportes de andamiaxe, ciclomotores, bicicletas, carteis ou calquera outro elemento nin gabear ou subir ós mesmos.
- g) Depositar, aínda de forma transitoria, materiais de obra sobre as árbores, ou verter nelas calquera clase de produtos tóxicos.
- h) Botar en zonas axardinadas lixo, residuos, cascotes, pedras, papeis, plásticos, graxas ou produtos cáusticos ou fermentables ou calquera outro elemento que poida dana-las plantacións.
- g) Depositar, aínda de forma transitoria, materiais de obra sobre as árbores, ou verter nelas calquera clase de produtos tóxicos.
- h) Botar en zonas axardinadas lixo, residuos, cascotes, pedras, papeis, plásticos, graxas ou produtos cáusticos ou fermentables ou calquera outro elemento que poida dana-las plantacións.
- i) Prender lume, calquera que sexa o motivo en lugares que non estean expresamente autorizados e non teñan instalacións axeitadas para facelo.

*Capítulo V**Protección de animais**ARTIGO 23.*

1. Para a boa conservación e mantemento das zonas verdes, así como das lagoas, estanques e fontes existentes nos mesmos non se permitirán os seguintes actos:

- a) Cazar calquera tipo de animal, así como escorrenta-las pombas, paxaros, anátidos e calquera outra especie de ave ou animal, perseguido ou consentir que os persigan cans nin outros animais.  
Tamén se prohíbe causar dano ningún nas zonas de cría ou niñadas destes animais.
- b) Pescar, inquietar ou causar dano ós peixes, así como botar calquera clase de desperdicios ás lagoas, estanques fontes o ríos.
- c) A utilización en tales lugares de utensilios ou armas destinados á caza de aves ou outros animais, como tiradores de goma, cepos, escopetas de aire comprimido, etc...

*ARTIGO 24.*

Os usuarios das zonas verdes non poderán abandonar nestes lugares especies de animais de ningún tipo. Cando, polas características e circunstancias de determinados animais, sexa aceptable a súa doazón, esta poderá ser autorizada polo Concello.

*Capítulo VI*  
*Protección do medio*

*ARTIGO 25.*

A protección de tranquilidade e sosego que intriga a propia natureza das zonas verdes esixe que:

- a) A práctica de xogos e deportes se realice nas zonas específicas acoutadas cando concorran as seguintes circunstancias:
  - 1ª.—Poidan causar molestias ou accidentes ás persoas.
  - 2ª.—Poidan causar danos e deterioro a plantas, árbores, bancos e demais elementos de mobiliario urbano, xardíns e paseos.
  - 3ª.—Impiden ou dificultan o paso de persoas ou interrompan a circulación.
  - 4ª.—Perturben ou molestan de calquera forma a tranquilidade pública.
- b) As actividades publicitarias realízanse coa expresa e previa autorización municipal.
- c) As actividades industriais restrinxíranse ó máximo, limitándose a venda ambulante de calquera clase de produtos, que soamente poderá efectuarse coa correspondente autorización municipal expresa para cada caso concreto.

A instalación de calquera clase de industrias, comercios, restaurantes, venda de bebidas ou refrescos, xeados, etc., requirirá autorización ou concesión administrativa de Concello, obtida coa tramitación que a normativa aplicable dispola en cada caso concreto.

Os concesionarios deberán limitarse á actividade autorizada, sendo responsables das súas limitacións ou incumprimento.

- d) Non sendo nos lugares especialmente habilitados para o efecto non se permitirá acampar, instalar tendas de campaña e vehículos habilitados para tal fin.

*ARTIGO 26.*

Nas zonas verdes non se permitirá:

- a) Lavar vehículos, lavar ou tender roupa nin tomar auga das bocas de rego.
- b) Efectuar inscricións ou pegar carteis nos valados, soportes de alumado público ou en calquera elemento existente nos parques e xardíns.
- c) Instalar calquera tipo de modalidade publicitaria nos parques.

Nas restantes zonas verdes soamente se autorizarán elementos publicitarios previamente homologados polo Concello.

- d) Realizar nos seus recintos calquera clase de reparación de automóviles, albanelería, xardinería, electricidade, etc. De se tratar de elementos propios do parque ou de instalación de concesionarios, requirirase a preceptiva autorización de Concello.

*Capítulo VII*  
*Vehículos nas zonas verdes*

*ARTIGO 27.*

- a) Bicicletas.-

Os nenos de ata 10 anos poderán circular en bicicleta polos paseos interiores dos parques, sempre que a escasa afluencia do público o permita e non causen molestias ós demais usuarios dos parques, e sempre baixo a responsabilidade dos pais ou persoa responsable.

- b) Circulación de vehículos de transporte:

Non poderán circular polos parques salvo:

1º Os destinados exclusivamente a empresas de servizos de quioscos ou instalacións semellantes.

2º Os do Concello de Marín.

c) Vehículos de eivados.

Poderán circular os que non desenvolvan unha velocidade superior os 10 Km/h.

#### ARTIGO 28.

Queda expresamente prohibida a entrada nos parques dos vehículos non recollidos no artigo anterior.

### Capítulo VIII

#### Uso e aproveitamento das praias

#### ARTIGO 29.

Estas normas teñen por obxecto, establecer as condicións xerais que deben cumprir as diferentes instalacións así como regular as actividades que se realicen nas nosas praias, co fin de protexer a saúde pública e o medio ambiente, así como conseguir unha mellora da imaxe do noso litoral.

#### ARTIGO 30.

O contido do presente capítulo será de aplicación a tódalas praias do municipio de Marín, así como ás instalacións ou elementos que ocupen ditos espazos.

#### ARTIGO 31.

A limpeza nas praias do municipio de Marín, realizarase por xestión directa ou indirecta do Concello, coa frecuencia e horario previstos para a axeitada xestión do servizo.

#### ARTIGO 32.

Queda terminantemente prohibido calquer acto que pudiera luxar as nosas praias, estando obrigado o responsable á limpeza inmediata, sen perxuízo das sancións que pudieran derivarse por tales feitos.

#### ARTIGO 33.

O Concello de Marín e a Xunta de Galiza instalarán contedores e papeleiras ao longo de todas as praias, dependendo das necesidades de cada zona e segundo estime a concellería con responsabilidade en materia de medio ambiente.

#### ARTIGO 34.

A Concellalía de Medio Ambiente instalará contedores de reciclaxe nas praias, de xeito que se facilite a reciclaxe selectiva dos residuos xerados.

#### ARTIGO 35.

Para una correcta utilización dos contedores deberanse seguir as seguintes normas:

- a) Non se empregarán para o vertido de líquidos, cascallos, madeiras, etc., así como para animais mortos ou enseres.
- b) Non se depositarán neles materiais en combustión.
- c) Os desperdicios depositaranse no interior do contedor, evitando o seu desbordamento e a acumulación de residuos ao seu arredor.
- d) Deberase pechar a tapa unha vez utilizado o contedor.
- e) O lixo deberá depositarse en bolsas perfectamente pechadas.



*ARTIGO 36.*

Queda terminantemente prohibido, aos usuarios das praias, chimpar calquer tipo de residuos á area, sobre todo se dito obxecto é de cristal, aluminio ou ferro debido aos graves problemas que podería ocasionar, debéndose utilizar os contedores instalados a tal fin; ademais tamén queda terminantemente prohibido arroxar cabichas dos cigarros na area. Desde o Concello realizaranse campañas de concienciación cidadá para evitar estas accións tan perxudiciais para todos. Calquera infracción deste artigo será sancionada, quedando ademais o infractor obrigado á recollida dos residuos por el arroxados.

*ARTIGO 37.*

Os quioscos e toda ocupación en primeira liña de praia deberán aterse aos horarios establecidos polo Concello para depositar o lixo proveniente dos seus negocios, sendo sancionados se non cumprisen dita norma.

*ARTIGO 38.*

Respecto á hixiene persoal:

- a) Queda prohibida a evacuación fisiolóxica no mar ou nunha praia.
- b) Queda prohibido lavarse no mar ou na praia empregando xabón, xel, champú ou calquer outro produto de limpeza.

*ARTIGO 39.*

Prohíbese a permanencia de calquera tipo de animais nas praias dende o quince de xuño ata o quince de setembro, e ademais durante a época do ano que vai dende o un de abril ata o catorce de xuño e do dezaseis de setembro ata o trinta de setembro esténdese esta prohibición de doce da mañá ata as vinte e unha horas.

*ARTIGO 40.*

O poseedor/a dun animal, sen perxuízo da responsabilidade subsidiaria do propietario/a, sera responsable dos danos e perxuizos que ocasione ás persoas, cousas e ao medio en xeral.

*ARTIGO 41.*

Permítese a presenza de cans destinados a traballos de salvamento ou auxilio a persoas necesitadas, cando as circunstancias así o aconsellen. Queda autorizado expresamente a presenza de cans lazarillos.

*ARTIGO 42.*

Queda prohibida a entrada e saída ao mar dende a praia aos pescadores submarinos co fusil cargado, así como a manipulación en terra deste ou doutros instrumentos de pesca submarina que poidan supoñer un risco para a seguridade das persoas.

*ARTIGO 43.*

As praias constitúen un ben de dominio público, tanto na súa modalidade de uso, como de servizo público; prohíbese expresamente o uso privativo das mesmas.

*ARTIGO 44.*

Queda prohibido en todos os areais o estacionamento e a circulación de vehículos de calquer tipo, de dúas, catro ou máis rodas, por tracción mecánica ou animal. Exímense de dita prohibición os vehículos de urxencia, seguridade ou servizos municipais.

*ARTIGO 45.*

A prohibición á que se refire o artigo anterior non será de aplicación a aqueles vehículos destinados á limpeza, mantemento e vixianza das praias, tales como motos, tractores e máquinas limpa-praias.

*ARTIGO 46.*

Queda terminantemente prohibida durante todo o ano e a calquer hora, a instalación de tendas de campaña, así como as acampadas de calquer duración de tempo nas nosas praias.

*ARTIGO 47.*

Calquer tipo de ocupación de praia, deberá dispor de autorización expresa da autoridade competente.

*ARTIGO 48.*

Queda terminantemente prohibido facer lume na praia, así como o uso de barbacoas, bombonas de gas para facer lume ou líquidos inflamables. Excepto aquelas festas ou eventos que teñan autorización previa do Concello.

*ARTIGO 49.*

Non se permitirá o uso de aparellos sonoros ou instrumentos musicais cando polo seu volume de sonoridade causen molestias aos demais usuarios das praias. Ademais queda terminantemente prohibido a partir das 12 da noite realizar calquer tipo de ruído que cause molestia aos veciños, exceptuando aqueles actos que sexan organizados ou estean autorizados polo Concello.

*ARTIGO 50.*

Nas zonas de baño, debidamente balizadas estará prohibida a navegación deportiva e de recreo e a utilización de calquer tipo de embarcación ou medio flotante movido a motor ou a vela agás as de salvamento. O lanzamento ou varado de embarcacións deberá facerse a través de canles debidamente sinalizadas.

*ARTIGO 51.*

Nos tramos de costa que non estean balizados como zona de baño, entenderase que está ocupa unha franxa de mar contigua á costa dunha anchura de 200 metros lineales nas praias e de 50 metros lineais no resto da costa.

Dentro destas zonas non balizadas para o baño, non se poderá navegar a unha velocidade superior a 3 nós, debendo adoptarse as precaucións necesarias para evitar riscos á seguridade das persoas.

*ARTIGO 52.*

Está prohibido calquera tipo de vertido dende as embarcacións.

*ARTIGO 53.*

Quedan prohibidos tanto na area da praia como na auga do mar, os xogos (pelotas, paletas,...), actividades ou exercicios que poidan molestar ao resto dos usuarios.

*ARTIGO 54.*

Exceptuense da prohibición do anterior artigo aquelas manifestacións de carácter deportivo ou lúdico organizadas ou autorizadas polo Concello.

*ARTIGO 55.*

Queda prohibida a venda ambulante de produtos alimenticios, así como de bebidas, e artigos de calquer outra orixe na praia.

*ARTIGO 56.*

A Policía poderá requisar a mercancía a aquelas persoas non autorizadas que realicen a venda de calquer tío de mercancía na praia.

*ARTIGO 57.*

Queda prohibida a publicidade nas praias a través de carteis ou valados ou por medios acústicos ou audiovisuais.

*ARTIGO 58.*

O Concello poderá dispoñer de persoal nas praias para vixiar a observancia do previsto nesta ordenanza, que actuarán como vixiantes debidamente uniformados e dependentes da concellería con responsabilidade en materia de praias, que será a encargada da fixación do servizo a prestar, turnos e horarios.

Para o exercicio das competencias municipais en orden a previr o pertinente sobre salvamento e seguridade das vidas humanas, contará co persoal necesario para a prestación de dito servizo.

*Capítulo IX**Protección do mobiliario urbano**ARTIGO 59.*

1. O mobiliario urbano existente nos parques, xardíns e zonas verdes, consiste en bancos, xogos infantís, papeleiras, fontes, sinalización, farolas e elementos decorativos como adornos, estatuas, etc., deberá manterse no máis axeitado e estético estado de conservación. Os causantes do seu deterioro ou destrución serán responsables non soamente do resarcimento do dano producido, senón que serán sancionados administrativamente de acordo coa falta cometida. Así mesmo, serán sancionados os que facendo un uso indebido de tales elementos prexudiquen a boa disposición e utilización dos mesmo polos usuarios de tales lugares. Para este efecto, e en relación co mobiliario urbano, establécense as seguintes limitacións:

*a. Bancos.*

Non se permitirá o uso desaxeitado dos mesmos como arrincar os que estean fixos; traslada-los que non estean fixados ó chan, agrupalos de forma desordenada; realizar comidas sobre os mesmos en forma que poidan mancha-los seus elementos; realizar inscricións ou pintadas sobre eles, e calquera acto contrario a súa normal utilización ou que deteriore á súa conservación.

As persoas encargadas do coidado dos nenos deberán evitar que estes, nos seus xogos, depositen sobre os bancos, area, auga, barro ou calquera elemento que poda luxalos ou manchar ós usuarios dos mesmos.

*b. Xogos infantís.*

Utilizaranse unicamente por nenos con idades comprendidas entres as establecidas nos correspondente sinais. Non se permite a utilización dos xogos infantís por adultos ou por menores de idade superior á que se indique, así como tampouco a utilización dos xogos de forma que exista perigo para os seus usuarios, ou de forma que poidan deteriorarse ou romperse.

*c. Papeleiras.*

Os refugallos ou papeis deberanse depositar nas papeleiras establecidas para tal fin.

Os usuarios deberanse abster de toda manipulación sobre as papeleiras: movelas, volcalas e arrincalas, así como de facer inscricións nas mesmas, adherir papeis ou outros actos que deteriore a súa prestación.

*d. Fontes.*

Os usuarios deberanse abster de realizar calquera manipulación nas fontes que non sexa propia do seu funcionamento normal, así como de practicar xogos nas fontes para beber.

Nas fontes decorativas, chafarices, bocas de rego, etc., non se permitirá beber utiliza-la auga das mesmas, bañarse ou introducirse nas súas augas, practicar xogos, nin ningunha manipulación dos seus elementos.

*e. Sinalización, farolas, estatuas e elementos decorativos.*

Nestes elementos de mobiliario urbano non se permitirá subirse, abanearse ou facer calquera outra acción ou manipulación, así como calquera acto que luxe, dane ou deteriore o mesmos.

*Título III**Da recollida e do tratamento dos residuos sólidos urbanos**Capítulo I**Normas xerais de recollida de residuos sólidos urbanos**ARTIGO 60.*

A recollida de residuos sólidos urbanos constitúe un servizo público municipal de carácter obrigatorio, que se rexerá polo disposto na lexislación básica do Estado e complementaria da Comunidade Autónoma así como polas disposicións contidas na presente ordenanza municipal. Dita recollida será establecida polo Concello, cos itinerarios, frecuencia e horario que se fixen, e emprestarase, ben directamente pola Administración Municipal ou a través de xestión indirecta.

*ARTIGO 61.*

1. Da recepción dos residuos sólidos urbanos farase cargo o persoal do Servizo Municipal ou se é o caso o da Empresa Concesionaria ou a Entidade de xestión que corresponda en cada momento, segundo se decida polo concello.

2. O Concello adquirirá a propiedade dos residuos dende o momento en que se depositen nos contedores ou lugares establecidos para o efecto e os posuidores quedarán exentos de responsabilidade polos danos que puidesen causar tales residuos, sempre que na súa entrega se observasen as condicións desta ordenanza e demais normativa aplicable.

3. Ningunha persoa física ou xurídica poderá dedicarse á recollida, transporte, ou aproveitamento dos residuos sólidos urbanos e industrias asimilables nin non asimilables, (sexan papel, cartón, madeira, vidros, plásticos, metais, pilas e baterías) calquera que sexa a súa natureza, sen a previa concesión ou autorización municipal.

En todo caso será unha empresa autorizada pola Consellería de Medio Ambiente como xestor autorizado de residuos.

4. A recollida ou retirada de residuos sólidos por particulares sen autorización municipal poderá ser obxecto de sanción, así como o seu depósito ou tenencia.



*Capítulo II*  
*Consideración de Residuos Sólidos Urbanos*

*ARTIGO 62.*

1. Terán a consideración de residuos sólidos urbanos os seguintes:

- a) Os residuos de orixe doméstica.
- b) Os residuos xerados en comercios, oficinas e servizos que non se atopen excluídos da cualificación de residuos sólidos urbanos na lexislación vixente así como todos aqueles que non teñan a consideración de perigosos e que pola súa natureza e composición poidan asimilarse ós producidos nos anteriores lugares ou actividades.
- c) Os residuos procedentes da limpeza das vías públicas, zonas verdes, áreas recreativas e praias.
- d) Os residuos procedentes de mercados, feiras, festexos, peregrinacións, excursións, acampadas ou actos similares.
- e) Os mobles, obxectos e electrodomésticos desbotados e os procedentes de pequenas obras de reparación domiciliaria.

2. O Concello poderá dispoñer que en toda a cidade ou en sectores ou zonas determinadas se presenten por separado ou se depositen en recipientes especiais aqueles residuos susceptibles de distintos aproveitamentos, tales como papel, cartón, vidros, latas, pilas, etc.

3. Será obriga do Servizo Municipal de recollida ou Empresa Concesionaria, o baleirado dos contedores propios do Servizo de Limpeza que se utilicen para depositar as varreduras e desperdicios procedentes das papeleiras.

4. Prohíbese a utilización por parte dos particulares con exclusividade para outros fins distintos dos propios, dos contedores do Servizo de Limpeza.

*ARTIGO 63.*

1. Os produtores de residuos sólidos urbanos estarán obrigados a entregalos ós servizos municipais na forma e condicións establecidas na presente ordenanza.

2. A entrega dos residuos sólidos urbanos ós servizos municipais realizarase do seguinte xeito:

- a) Con carácter xeral, nos contedores situados para o efecto nas vías e espazos públicos, utilizando o contedor específico para cada tipo de residuo.
- b) Os usuarios están obrigados a utilizar elementos de contención para a evacuación dos residuos sólidos urbanos. Consideranse envases axeitados para tal fin as bolsas de plástico, sacos de plástico ou de papel que sexan impermeables e non desgarrables. En todo caso os elementos que conteñan o lixo deberán estar perfectamente atados.
- c) Se como consecuencia dunha deficiente presentación do lixo, se produciran vertidos, a persoa causante será responsable da sucidade ocasionada na vía pública.
- b) Directamente no punto limpo (cando exista), nos contedores específicos, para os residuos especiais sinalados no artigo 65.2 ou no punto a sinalar para a súa recollida a domicilio.
- d) Directamente no vertedoiro de residuos inertes, os residuos non perigosos derivados das obras de construción de demolición.
- e) Os cadáveres de animais domésticos de compañía serán recollidos no domicilio dos posuidores, trala solicitude ós servizos municipais, nas datas, horarios e frecuencias que se sinalen pola Alcaldía.
- f) Os mobles e útiles domésticos poderán entregarse no Punto Limpo (cando exista) ou ser recollidos a domicilio, trala solicitude dos posuidores, nas datas, horarios e frecuencias que se sinalen polo Concello.

## ARTIGO 64.

1. O depósito dos residuos sólidos urbanos farase obrigatoriamente de xeito selectivo nas rúas onde existan os contedores específicos que se sinalan a continuación, nunha distancia máxima de 200 metros do domicilio dos posuidores. Dito depósito farase obrigatoriamente do seguinte modo:

- Contedor verde: materia orgánica e residuos que non poidan ser reciclados e contidos en bolsas ou sacos tal como se indica no artigo anterior.
- Contedor amarelo: envases e residuos de envases lixeiros (envases plásticos, latas e envases de tipo brik).
- Contedor Iglú Verde: só vidro.
- Contedor azul: só papel e cartón.
- Contedor de pilas: só pilas usadas.

2. Deberán depositarse no Punto Limpo (cando exista), nos contadores correspondentes ou no punto a sinalar para a súa recollida a domicilio, os seguintes tipos específicos de residuos:

- a) Vernices, pinturas e residuos de pinturas.
- b) Aceites pesados procedentes de coches, tractores e vehículos de motor en xeral.
- c) Aceites domésticos.
- d) Baterías.
- e) Aparellos metálicos (neveiras, lavadoras, cociñas, electrodomésticos en xeral, somieres e similares).
- f) Obxectos de madeira e outros obxectos (sofás, camas, armarios, colchóns e outros similares).
- g) Outros residuos sólidos urbanos que non sexan susceptibles de ser reciclados e se sinalen pola Alcaldía ou pola Concellería competente.

3. Ademais de poder depositarse no Punto Limpo (cando exista), os servizos municipais recollerán os residuos sólidos urbanos especiais descritos nas letras f) e g) do punto anterior coa periodicidade e nas datas que se sinalen pola Alcaldía, tras solicitude dos interesados.

4. Os establecementos e oficinas que, polo volume de lixo producido, precisen un maior número de contedores dos subministrados polo servizo municipal deberán adquirilos pola súa conta, debendo reunir as características que se indiquen polo Concello para os efectos de permitir a súa recollida polos servizos municipais.

Os titulares de tales contedores teñen a obriga de conservarlos en adecuadas condicións de hixiene, debendo lavalos periodicamente mediante auga a presión. O lavado non poderá realizarse na vía pública.

5. As operacións de lavado e limpeza que esixan os recipientes normalizados serán efectuadas periodicamente polo concello ou empresa concesionaria do servizo, salvo nos casos dos contedores individuais que deberán ser lavados e mantidos en bo estado polos usuarios dos mesmos.

6. Os titulares de establecementos que manexen ou utilicen produtos perecedoiros deberán depositar os residuos en contedores específicos da súa titularidade, non podendo usar os comunitarios e depositando sempre os residuos en bolsas herméticas, evitando a súa dispersión e tamén a xeración de malos olores.

7. As caixas de cartón de grandes dimensións deben ser esnaquizadas e empacetas correctamente nos contedores específicos ou ocupando o menor espazo posible se estes estivesen cheos. Nas rúas peonís o cartón depositarase deste modo e perfectamente embalado.

8. Todos aqueles establecementos que sexan grandes produtores de residuos deberán manter os seus contedores individuais no interior das súas dependencias ata as 20.00 horas, excepto os meses de xuño a setembro, nos que non poderán depositarse na rúa antes das 22.00 horas. Para tal efecto, estarán obrigados a dispoñer dun lugar específico dentro do seu establecemento para a custodia destes contedores.

*ARTIGO 65.*

1. Nas zonas en que existan recipientes normalizados, os veciños depositarán neles os residuos e o persoal do vehículo contedor baleirá o contido dos recipientes no camiión e depositaraos baleiros onde se encontraban.

2. Nun e noutro suposto o lixo e desperdicios depositaranse en bolsas pechadas e non poderán ser deixadas nos contedores ou na vía pública, antes das 20:00 horas e de luns a sábado.

3. Prohíbese depositar o lixo nas datas que o Concello indique como inhábiles do Servizo, o que se comunicará coa antelación precisa.

*ARTIGO 66.*

1. Os contedores serán situados na vía pública, naqueles lugares que se determinen pola Administración Municipal. Non poderán moverse do seu lugar de orixe salvo causa de forza maior. Unha vez baleirados os recipientes non desbotables, procederase ó seu retirado, en caso de supermercados ou establecementos que teñan contedores grandes.

2. Nos supostos en que os establecementos comerciais xeren un elevado número de residuos urbanos asimilables, o Concello poderá esixir a instalación dun sistema de compactación previo dos residuos, que se depositarán nos recipientes normalizados.

*ARTIGO 67.*

1. Nos centros públicos ou privados, mercados, galerías de alimentación, centros sanitarios, etc., a recollida efectuarase polo Servizo Municipal ou Empresa concesionaria.

2. Se unha Entidade Pública ou privada tivese por calquera causa que desprenderse de residuos sólidos en cantidades maiores ás que constitúe a produción diaria normal e non de forma frecuente, non deberá presentalos conxuntamente cos residuos habituais. Neste caso, a Entidade poderá dispoñer o seu transporte ó Centro de Transferencias ou ó lugar establecido polo Concello tralo pagamento das taxas correspondentes ou ben solicitar do Servizo de Recollida ou Empresa concesionaria, a súa retirada, aboando os custos correspondentes.

3. Os grandes xeradores de residuos urbanos estarán obrigados a dispoñer dun lugar específico dentro do seu establecemento para a custodia destes contedores.

*Capítulo III  
Residuos Industriais*

*ARTIGO 68.*

Serán considerados residuos industriais especiais aqueles que polas súas características non poidan ser clasificados como inertes ou asimilables ós residuos urbanos e en xeral os que presenten un risco potencial para a saúde pública ou para o medio ambiente.

*ARTIGO 69.*

1. Os produtores e posuidores de residuos industriais especiais estarán obrigados á adopción de cantas medidas sexan necesarias para asegurar que o transporte, tratamento, eliminación ou, se é o caso, aproveitamento dos mesmos, se realice sen risco para as persoas.

2. Para desfacerse dos residuos industriais comunicarse ao servizo de limpeza ou trasladaranse ó punto limpo (cando exista) por separado, para ser clasificados e enviados ó reciclador correspondente, ademais será necesaria a correspondente autorización municipal, indicándose, á vista da natureza e características dos mesmos, o lugar para a súa eliminación ou aproveitamento.

3. Os produtores de residuos que poidan resultar tóxicos ou perigosos deberán, previamente á súa recollida por xestor autorizado, realizar un tratamento para eliminar ou reducir as súas características así como adoptar as medidas para asegurar o seu traslado.

4. Nestes casos a empresa ou o produtor destes residuos estará obrigado a cumprir a normativa vixente.

#### ARTIGO 70.

1. En ningún caso se permitirá o vertido de residuos industriais que pola súa natureza sexan causantes de malos olores, etc., en zonas próximas a vivendas e en lugares non preparados para iso nin na rede de sumidoiros municipal.

2. Non pode realizarse no termo municipal a eliminación de residuos mediante a súa incineración.

### Capítulo IV

#### Residuos Especiais

##### Sección Primeira – Terras e Cascallos

#### ARTIGO 71.

1. O vertido destes materiais farase necesariamente no vertedoiro de inertes, sen prexuízo do disposto no punto 4 deste Artigo.

2. Queda terminantemente prohibido depositar nos recipientes normalizados os cascallos procedentes de calquera clase de obras.

3. O pequeno cascallo que resulte asimilable no sistema de eliminación e tratamento de lixos adoptado polo municipio poderá ser depositado no Punto Limpo (cando exista).

4. Poderá autorizarse excepcionalmente o vertido de cascallo non asimilable nos terreos que propoña o solicitante sempre que se trate de material inerte e conte co informe favorable dos Técnicos Municipais.

5. No suposto anterior de utilización do cascallo ou terras para recheos ou utilización en terreos particulares deberá solicitarse previamente a preceptiva licenzia municipal, acompañando se é o caso memoria sobre impacto medio ambiental.

Poderá autorizarse así mesmo con carácter provisional o depósito de cascallos mentres se realice unha obra determinada.

6. Queda prohibido acumular produtos nocivos preceiduros en soares ou terreos.

#### ARTIGO 72.

1. Prohíbese depositar na vía pública toda clase de cascallos ou desperdicios procedentes de obras de construción e remodelación de edificios ou de obras realizadas no interior dos mesmos, sexa na totalidade ou nalgunha das vivendas.

2. Igualmente queda prohibido almacenar na vía pública, fóra dos límites do valo protector das obras, material de construción: area, ladrillos, cemento, etc., así como a súa manipulación.

#### ARTIGO 73.

1. Os residuos e materiais do artigo anterior só poderán almacenarse na vía pública utilizando para iso contedores adecuados instalados nela que deberán cumprir os requisitos e condicións que se sinalan na Ordenanza Municipal correspondente ou que sexan autorizados polo Concello.

2. A colocación de contedores requirirá autorización municipal, tralo pago das taxas correspondentes.

3. Os contedores deben estar dotados dos dispositivos adecuados que permitan mantelos cubertos cando non sexan utilizados, para preservar o ornato urbano e evitar que outras persoas boten neles lixos domiciliarios ou trastes inútiles.



4. Cando os contedores se atopen cheos de cascallos procederase, en prazo non superior a vinte e catro horas, á súa retirada e substitución por outros baleiros. Para estes efectos os materiais depositados non poderán exceder en ningún caso o plano delimitado polas arestas superiores do contedor, estando prohibido o uso de suplementos ou engadidos para aumentar a capacidade do recipiente.

En caso de incumprimento, o Concello poderá retirar os contedores que, unha vez baleiros, quedarán en depósito, tralo pago dos gastos a que ascenda a retirada, transporte e vertido.

#### *Sección Segunda–Aparatos Metálicos, Útiles de Madeira e Outros Obxectos Inútiles*

##### *ARTIGO 74.*

1. Queda prohibido depositar nos espazos públicos, mobles, utensilios e obxectos inútiles para que sexan retirados polos camións contedores da recollida domiciliaria.

2. Queda prohibido depositar na vía pública obxectos para reserva de espazo.

3. Queda prohibido o abandono de vehículos nas vías públicas. Nestes casos o Concello procederá conforme ó disposto na Lei sobre Tráfico, Circulación de Motor e Seguridade Vial.

4. Queda prohibido ter como expositores na vía pública vehículos ou calquera outro dispositivo así como utilizar a vía pública como exposición de alimentos ou materiais, agás postos do mercado autorizados. Estes artigos poderán ser requisados por persoal municipal e sempre se cobrarán as taxas correspondentes.

5. As persoas que desexen desprenderse de tales elementos utilizando os servizos municipais solicitarano nas oficinas municipais, cubrindo o correspondente impreso, con antelación suficiente ou mediante aviso telefónico.

5.1. Establécense o MÉRCORES ou o inmediato día hábil posterior se este fose festivo, para a recollida dos aparellos metálicos (neveiras, lavadoras, cociñas, electrodomésticos en xeral, somieres,...), e útiles de madeira e outros obxectos (sofás, camas, armarios, colchóns...)

5.2. En calquera caso se fose urxente desprenderse dalgún destes obxectos, os propios posuidores poderán trasladalos e entregalos pola súa conta no Punto Limpo (cando exista).

#### *Sección Terceira – Animais Mortos*

##### *ARTIGO 75.*

As persoas que necesiten desprenderse de animais mortos enterraranos en lugar apropiado debendo indicar ós operarios municipais a causa da morte, co fin de que se adopten as medidas sanitarias pertinentes na súa eliminación.

##### *ARTIGO 76.*

A retirada de animais mortos na vía pública será competencia do propietario, se é coñecido, e do Servicio Municipal de Limpeza ou Empresa Concesionaria do Servizo.

#### *Sección Quinta – Residuos Clínicos*

##### *ARTIGO 77.*

Para os efectos desta Ordenanza consideraranse residuos clínicos:

1. Os procedentes de vendaxes, gasas, algodón, xiringas, restos de medicamentos ou os seus envases, tubos de ensaio, etc.

2. Os asimilables ou residuos domiciliarios, tales como restos de comida, lixos procedentes da limpeza e embalaxes, de Residencias e Centros Sanitarios.

3. En xeral todo residuo que se produza en clínicas, sanatorios, hospitais, laboratorios e demais establecementos sanitarios de carácter análogo.

#### ARTIGO 78.

1. Os residuos procedentes de centros sanitarios han de estar debidamente envasados e pechados, utilizando para iso recipientes normalizados.

2. En ningún caso se permitirá o depósito ou vertido de materias radioactivas nin de restos patolóxicos.

3. Non se autorizará o vertido no termo municipal debendo facelo nos lugares autorizados pola Comunidade Autónoma.

### *Sección Quinta – Outros Residuos*

#### ARTIGO 79.

Inclúense neste epígrafe outros residuos non sinalados especificamente entre os especiais ou aqueles que, procedendo de actividades comerciais, esixan unha recollida, transporte e tratamento selectivo por razón das condicións anormais en que os mesmos puidesen atoparse.

#### *Artigo 80.*

Non se permitirá o vertido incontrolado en todo o Municipio, en particular de produtos químicos, materias graxas, oleaxinosas, líquidos e calquera outro material non asimilable ou que sexan propios de Vertedoiros industriais ou especiais, nin en contedores nin en redes de sumidoiros.

### *Capítulo V*

#### *Do tratamento dos residuos*

#### ARTIGO 81.

A xestión do Servizo poderá facerse mediante xestión directa ou indirecta.

Polo Concello de Marín poderanse establecer, ademais dos vertedoiros, estacións de transferencia ou planta de eliminación mediante convenios ou outros acordos con SOGAMA, a Xunta de Galicia ou outras Entidades Locais, para vertedoiros destinados ó vertido de residuos especiais e cascallos.

#### ARTIGO 82.

As instalacións industriais para a eliminación e aproveitamento dos residuos, nas súas formas de compostaxe, reciclaxe, incineración, pirólise e pirofusión, etc., estarán ó que dispoñan as leis vixentes na materia.

#### ARTIGO 83.

1. Queda prohibido no ámbito do termo municipal o depósito e vertido de lixos e residuos en zonas distintas ás instalacións municipais dedicadas a tal fin.

2. Todo vertedoiro clandestino será clausurado sen prexuízo das sancións ás que houberse lugar.

3. Cando a Administración ordene a limpeza e/ou peche dun soar ó seu propietario e o mesmo non o fixese, no prazo que se lle outorga, a administración procederá a realizar a obra de forma subsidiaria con gastos por conta do obrigado, independentemente da sanción que lle fose imposta por desobediencia á autoridade

*ARTIGO 84.*

1.—O Concello a través dos servizos técnicos e dos axentes da policía municipal ou outro persoal municipal denunciarán cantas infraccións se produzan en relación coas normas da presente ordenanza.

2.—Igualmente poderá calquera persoa natural ou xurídica denunciar ante o Concello as infraccións da presente ordenanza.

*Título IV**Protección medio ambiental fronte a actividades xeradoras de po, fumes, líquidos ou outros elementos de contaminación.**ARTIGO 85.-*

O presente título ten por obxecto a regulación de cantas actividades, situacións e instalacións sexan susceptibles de producir emisións de gases ou de partículas sólidas ou líquidas no Termo Municipal de Marín para evitar a contaminación atmosférica ou acuífera e o risco que provoquen á saúde humana, ós recursos naturais e ó medio ambiente.

*ARTIGO 86.-*

Para os efectos desta ordenanza considérase contaminación a presenza no aire ou augas de materias que impliquen risco, dano ou molestias graves para as persoas ou bens de calquera natureza.

Enténdese por límites de inadmisión as presenzas na atmósfera ou nos acuíferos de elementos contaminantes que illadamente ou asociados con outros superen as concentracións máximas tolerables, sendo estas as establecidas pola lexislación estatal, autonómica ou da Unión Europea aplicable á actividade de que se trate.

Os establecementos e instalacións susceptibles de producir contaminación deberán cumprir na súa integridade as medidas correctoras impostas para a concesión da licenza de apertura e mantelas en adecuado estado de funcionamento. Así mesmo, se a pesar diso producen contaminación, deberán presentar ante esta Entidade Local un proxecto de ampliación de actividade, tramitado conforme ó disposto no Regulamento de Actividades Molestas, Insalubres, Nocivas e Perigosas onde aparezan corrixidas no estudo suscrito polo técnico competente de cumprimento do disposto na normativa reguladora de aplicación.

No referido estudo ou proxecto xunto co de ampliación se é o caso deberá figurar o de depuración de emisións xa existentes, adoptando aqueles medios anticontaminantes necesarios e as medidas preventivas, correctoras e/ou reparadoras para reducir ditos niveis a límites regulamentarios.

Cando os niveis de emisión de contaminación superen os indicados na normativa vixente, tralo requirimento municipal, o produtor dos mesmos deberá presentar no prazo de dous meses o referido proxecto técnico, podendo en caso de incumprimento e de existir risco ambiental decretarse pola Entidade Local a suspensión temporal da licenza de apertura de que dispoña.

*ARTIGO 87.-*

Os técnicos municipais así como o persoal que sexa oficialmente designado para realizar a inspección e verificación das instalacións, empresas ou establecementos, gozarán no exercicio das súas funcións da consideración de “Axentes da Autoridade”

*ARTIGO 88.-*

O Concello poderá esixir ás empresas potencialmente contaminadoras a medición dos contaminantes vertidos polo menos unha vez ó ano, podendo aumentar a súa frecuencia se os servizos técnicos municipais o consideran xustificado. Tal medición, que será supervisada polos servizos técnicos municipais, deberá ser realizada por empresa ou laboratorio homologado e deberá ser remitida ó Concello.

En caso de incumprimento do anteriormente disposto as medicións serán realizadas polo Concello ou por unha entidade colaboradora da Administración, debendo aboar as empresas incumpridoras os gastos orixinados con independencia da posible sanción administrativa.

*ARTIGO 89.-*

As actividades potencialmente contaminantes serán inspeccionadas polo Concello de oficio ou a instancia de parte cando se presuma que a contaminación poida ser excesiva ou o requira a planificación establecida polos servizos municipais. A inspección municipal comprenderá as comprobacións seguintes:

1. De que continúan cumpríndose as condicións e as medidas correctoras establecidas no outorgamento das licencias ou autorizacións correspondentes.

2. Comprobación de que se respectan os niveis de emisión legalmente vixentes en cada momento.

As actuacións inspectoras así como as probas, ensaios ou comprobacións poderán ser realizadas tanto polos propios servizos municipais como mediante a asistencia técnica procedente.

*Título V*

*Publicidade: Valados Publicitarios, Megafonía, Publicidade a domicilio, Recadros para a Publicidade, Marquesiñas, Pintadas, Graffitis, Pancartas, e Outros*

*ARTIGO 90.*

1. Queda prohibido repartir ou lanzar carteis, folletos ou follas soltas, luxando os espazos públicos e a colocación de publicidade en lugares non autorizados.

2. Terá a consideración de acto independente para o efecto de sanción cada actuación separada no tempo ou no espazo, contraria ó establecido no número anterior, sendo responsables da infracción aquelas persoas físicas ou xurídicas que promovan ou xestionen a publicidade, e, en defecto delas e salvo proba en contrario, aquelas a favor de quen se faga a mesma.

3. Os folletos publicitarios depositaranse nas caixas do correo ou lugares designados por cada comunidade, nunca por debaixo das portas ou de forma que se poidan espaxear pola vía pública.

4. Sen prexuízo das sancións ás que houbese lugar tipificadas nesta Ordenanza, correrán cos gastos de limpeza ocasionados por tal actitude as empresas ou persoas físicas anunciadas, salvo denuncia expresa, ou os autores da súa colocación se se logra a súa identificación.

5. Queda prohibido aparcar carriños ou vehículos similares con valos publicitarios en terreos públicos ou privados, salvo os expresamente autorizados coa correspondente licenza municipal. En todo caso non se permitirá o seu estacionamento na vía pública, no mesmo lugar, por un período superior a 24 horas.

*ARTIGO 91.*

1. Co obxecto de manter as condicións de limpeza e pulcritude que esixe o ornato e a estética da vila, queda prohibido:

- a) Colocar carteis en paredes, muros, quioscos, fachadas, farolas, enreixados, valos, papeleiras, contedores, marquesiñas de parada de autobús, mobiliario urbano en xeral.
- b) Prohíbese a realización de toda clase de pintadas na vía pública; tanto sobre os seus elementos estruturais (beirarrúas, calzadas, mobiliario urbano) como sobre os muros ou fachadas dos edificios.

Quedan excluídas desta prohibición as pintadas ou murais artísticos que se realicen sobre valados dos soares, medianeiras, etc., que sexan autorizadas polo Concello.

- c) Raspar, luxar ou arrincar aqueles carteis ou anuncios situados nos lugares autorizados para o efecto.



d) O espaxamento de folletos ou follas de publicidade pola vía pública (repite 93.4).

2. Consideraranse separadamente como actos sancionables as actuacións contrarias ó disposto no punto anterior en relación cos anuncios ou carteis de calquera contido fixados en cada inmovible ou demais lugares prohibidos, podendo impoñerse sancións por cada cartel ou folleto que transgredisen estas normas.

#### ARTIGO 92.—COLOCACIÓN DE PANCARTAS.

Queda prohibida a colocación de pancartas en calquera dos elementos estruturais existentes no casco urbano: edificios, muros, pontes, valados, beirarrúas, elementos do mobiliario urbano e similares.

A colocación de pancartas soamente se autorizará:

- En período de eleccións.
- En período de festas populares ou tradicións.
- En eventos culturais ou deportivos de especial interés.
- En situacións que expresamente se sinalen polo Concello.

Deberán ser retiradas nos 10 días seguintes ó do vencemento do prazo para o que foron autorizadas.

#### ARTIGO 93.

1. Os propietarios ou titulares de inmoables, monumentos, quioscos, etc., coidarán, en cumprimento da obriga establecida no artigo 13, de manter limpas as paredes e fachadas de calquera tipo de anuncio que non sexa o específico dunha profesión ou actividade mercantil.

2. Unicamente se permitirá a colocación de carteis ou anuncios nos sitios destinados para este obxecto.

3. Así mesmo os propietarios dos soares coidarán que os valos estean en perfecto estado de conservación, limpándoos e pintándoos, especialmente no núcleo urbano, coidando que non saia ningún tipo de vexetación ó exterior.

#### ARTIGO 94.

Cando un inmovible fose obxecto de pintadas ou pegada de carteis, o propietario ou persoa encargada comunicarao ó Concello, o cal decidirá se procede á limpeza por persoal municipal, con cargo á persoa ou Empresa responsable da actuación, en caso de ser esta coñecida, sendo todo iso sen prexuízo da obriga xenérica de manter por parte dos propietarios a limpeza das fachadas.

#### ARTIGO 95.

1. Durante todo o ano a publicidade colocarse unicamente nos lugares autorizados.

Durante os períodos electorais e aqueloutros de xeral participación cidadá, nos que sexa pertinente a realización de actos de propaganda e publicidade, o Concello de Marín adoptará, de conformidade co que se dispoña na respectiva normativa, espazos especialmente reservados para a súa utilización como soportes publicitarios.

2. Para os efectos de sancións a que houberse lugar en relación a este artigo serán responsables o Presidente Local ou cargo de máxima responsabilidade do Partido na localidade e, se se tratase de Eleccións Locais, o Cabeza de Lista do Partido ou da Agrupación que se presente.

3. O Concello, en exemplo do cumprimento desta Ordenanza, respectará para a difusión dos seus Bandos e Carteis os puntos anteriores

*Título VI*  
*Réxime Sancionador*

*Capítulo I – Normas Xerais*

*ARTIGO 96.*

1. O Concello incoará de oficio expedientes sancionadores baseándose nas denuncias dos servizos técnicos e dos axentes da Policía Municipal polas infraccións que se produzan en relación coas normas da presente ordenanza.

*ARTIGO 97.*

1. As responsabilidades derivadas do incumprimento das obrigas sinaladas na presente Ordenanza serán esixibles non só polos actos propios, senón tamén polos daquelas persoas de quen se deba responder e polo proceder dos animais ou causas que se fose propietario.

2. Cando se trate de obrigas colectivas, a responsabilidade será atribuída á respectiva comunidade de propietarios ou habitantes do inmovible cando non estea constituída e, para o efecto, as denuncias formularanse contra o mesmo ou, se é o caso, a persoa que ostente a súa representación.

3. Cando se trate de depósito de lixos ou de sacudida de alfombras ou prendas á vía pública e non se poida detectar o infractor exacto do edificio, notificaráselle ó Presidente da Comunidade de Veciños, e poderá responsabilizarse á Comunidade da infracción, caso de non comunicar o nome e domicilio do infractor.

*ARTIGO 98.*

1. Consideraranse infraccións administrativas en relación coas materias a que se refire esta Ordenanza os actos ou omisións que contraveñan o establecido nas normas que integren o seu contido.

2. As infraccións clasifícanse en LEVES, GRAVES, E MOI GRAVES, conforme se establece nos artigos seguintes:

*Capítulo II – Procedemento Sancionador e Sancións*

*ARTIGO 99.*

1. Para impoñer unha sanción derivada dunha infracción recollida na presente Ordenanza deberá incoarse o oportuno expediente sancionador, que se tramitará conforme ó Real Decreto 1398/1993 de 4 de agosto, polo que se aproba o Regulamento de procedemento para o exercicio da potestade sancionadora, e á normativa vixente en materia de procedemento administrativo común.

2. A competencia para a incoación dos expedientes e imposición da sanción corresponde á Alcaldía ou a Delegación desta, agás que a lexislación sectorial estatal ou autonómica atribúa a competencia a órganos doutra Administración.

*ARTIGO 100.*

Sen prexuízo de que determinados feitos dun lugar a responsabilidade penal ou de que a lexislación sectorial estatal ou autonómica fixe outra tipificación;

*1. Considéranse Infraccións Leves:*

- a) A falta de limpeza das rúas particulares ou outros espazos libres do mesmo carácter.
- b) Botar desperdicios á vía pública así como realizar as operacións prohibidas no Artigo 7, agás cambia-lo aceite e outros líquidos ós vehículos, que terá a consideración de grave.
- c) O incumprimento das disposicións en materia de limpeza, nos supostos do Artigo 9.

- d) Expoñer alimentos ou outros produtos comerciais na vía pública ou vehículos, agás postos autorizados para o mercado ou venda ambulante.
- e) Deixar na vía pública residuos procedentes da limpeza de escaparates, portas ou toldos de establecementos comerciais.
- f) Raspar, luxar ou arrincar carteis ou anuncios colocados nos lugares autorizados ou colocalos en lugares non autorizados, neste caso aplicarase a falta por cartel.
- g) En relación cos recipientes herméticos e baldes (contedores) normalizados: a falta de coidado cos mesmos, colocalos na vía pública ou retiralos fóra do tempo establecido, utilizar outros distintos ós autorizados, quitar lixos que os desborden, etc.
- h) Deposita-lo lixo e os desperdicios sen bolsa nos contedores ou na vía pública.
- i) Deposita-lo lixo fóra do horario autorizado.
- l) Utilizar os contedores de recollida selectiva para depositar residuos domiciliarios distintos dos específicos para cada contedor.
- m) Non proceder á limpeza das deposicións dos cans en lugares públicos por parte da persoa que o conduza ou, en defecto desta, polo seu dono, así coma, non impedir que os cans fagan as súas deposicións en lugares destinados ó tránsito de viandantes.
- n) Non manter en adecuado estado de funcionamento por negligencia a totalidade das medidas correctoras contra a contaminación impostas a unha determinada actividade, ou a realización casual de contaminación por non ter adoptado as medidas correspondentes, sempre que sexa a primeira vez que o infractor incorra nesta conducta.
- o) Deixar os residuos ou as bolsas de lixo fóra dos contadores sempre que non se atopen saturados.
- p) Deixa-las caixas de cartón fóra dos contedores azuis ou soterrados sen pregar ou introducilas do mesmo xeito, sempre que nos contedores haxa capacidade suficiente.
- q) Usar bicicletas nas zonas non permitidas de parques e zonas verdes.
- r) Tirar a auga dos baldes de limpeza na vía pública.
- s) Realizar pintadas, graffitis, etc. en mobiliario urbano, bambáns (xogos infantís) ou en lugares non destinados para tal fin.
- t) Deixar publicidade (panfletos, etc.) nos limpaparabrisas de vehículos estacionados na vía pública ou tirala nos portais ou das caixas do correo á rúa ou calquera outra repartida fóra do autorizado na presente Ordenanza.
- u) A deficiencia na limpeza de zonas verdes que dean a unha vía pública, así coma, deterioralos elementos vexetais, atacar ou inquietar os animais existentes nas zonas verdes ou abandonar nas mesmas especies animais de calquera tipo.
- v) Practicar xogos e deportes en sitios e de forma desaxeitada, usando inadecuadamente o mobiliario urbano.
- w) A presenza de animais na praia durante a época de baño, correspondendo ó posuidor do animal a responsabilidade.
- x) O uso de aparato sonoro ou instrumento musical cando o seu volume de sonoridade cause molestias aos demais usuarios das praias.
- z) O uso indebido do auga das duchas e lavapés.
- z) bis.—Calquera outra acción ou omisión que infrinxa as disposicións desta ordenanza e non estea tipificada como grave ou moi grave.

## 2. Consideraranse Infraccións Graves:

- a) A reincidencia en tres infraccións leves.
- b) Cambiar o aceite e outros líquidos ós vehículos na vía e espazos libres públicos.
- c) Realizar actos de propaganda mediante reparto, lanzamento de carteis, folletos, follas soltas, etc., que luxen os espazos públicos.
- d) Omitir as operacións de limpeza despois da carga ou descarga de vehículos ou incumpri-las obrigas do Artigo 10.

- e) Incumpri-las normas relativas á retirada de cascallos procedentes de obras e limpeza nas vías públicas que sinalan os Artigos 10, 11, 12 e 71.4 da presente ordenanza.
- f) Colocar carteis en lugares non permitidos e realizar inscricións ou pintadas en lugares non autorizados segundo o Artigo 94.
- g) Usar indebidamente ou danar os recipientes herméticos subministrados polo Concello así como causar deterioración nas papeleiras.
- h) Abandonar mobles ou obxectos na vía ou espazos públicos.
- i) Abandonar cadáveres de animais ou a súa inhumación en terreos de dominio público.
- l) Abandonar vehículos nas vías públicas.
- m) A instalación e uso de aparellos de reprodución de música no exterior dos establecementos.
- n) A reiteración e habitualidade na produción de contaminación por po, fumes, líquidos ou outros elementos sen adoptar as medidas correctoras ou por insuficiencia das mesmas sen ter procedido á tramitación do expediente de ampliación de actividade regulada nesta Ordenanza.
- o) Abandonar animais mortos.
- p) Non retirar-los contedores de obras no prazo establecido.
- q) Usar vehículos a motor en zonas non autorizadas de parques e zonas verdes excepto minusválidos.
- r) O incumprimento das normas de limpeza por parte dos titulares dos servizos de temporada de praia, ou de calquer outra actividade autorizada polo órgano competente.
- s) O depósito en contadores de materiais de combustión por parte dos usuarios da praia.
- t) Abandonar un animal na praia.
- u) Practicar a pesca en época ou lugar non autorizado.
- r) O uso de escopeta ou instrumento de pesca submarina que poida supor risco para a seguridade das persoas.
- v) O estacionamento ou circulación de vehículos, de calquer tipo, nas praias.
- w) Instalar tendas de campaña donde non estea permitido.
- x) Facer lume na praia así como usar barbacoas, bombonas de gas ou outros utensilios para facer lume.
- z) A evacuación fisiolóxica no mar o na praia.
- w) Lavarse no mar o na praia empregando xabón ou calquer outro produto de limpeza.
- x) Bañarse cando estea izada a bandeira vermella.

### 3. Consideraranse Infraccións moi graves:

- a) Reincidencia en dúas faltas graves.
- b) Dedicarse á recollida, transporte ou aproveitamento de residuos sen a debida autorización.
- c) Non proporcionar ó Concello os datos relativos á natureza dos residuos ou facilitar información falsa sobre os mesmos.
- d) Vertido de lixos e residuos sólidos en lugares non autorizados.
- e) Queimar lixos.
- f) Depositar residuos clínicos.
- g) A rotura total ou parcial de árbores ou arrincar plantas de parques, xardíns ou xardineiras públicas.
- h) Que a acción ou omisión infractora afecte a plantacións que estivesen catalogadas como de interese público
- i) Que o estado dos elementos vexetais supoña un perigo de propagación de pragas ou enfermidades ou entrañe grave risco para as persoas.
- l) A celebración de festas, actos públicos ou competicións deportivas sen autorización municipal.

- m) O vertido ou depósito de materias que poidan producir contaminación e risco de accidentes.
- n) Realizar calquera ocupación con instalación fixa ou desmontable sen contar coa preceptiva autorización.
- o) A varada ou permanencia de embarcacións, táboas de windsurf, hidropedais, motos acuáticas etc. fóra das zonas sinaladas e destinadas a tal fin.
- p) A circulación de embarcacións a distancia inferior a 200 metros da costa.
- q) A causa de calquera tipo de impacto negativo sobre a fauna e flora tanto do litoral coma marina.

*ARTIGO 101.—FÍXASE O SEGUINTE CADRO DE SANCIÓNS:*

- a) FALTAS LEVES: apercibimento e multas ate 750 euros.
- b) FALTAS GRAVES: multas de 100 euros a 1.500 euros e/ou peche temporal da actividade.
- c) FALTAS MOI GRAVES: multas de 1.500 euros a 3.000 euros e/ou peche temporal da actividade ou peche definitivo.

*ARTIGO 102.*

Para determina-la contía da sanción atenderase ás circunstancias concurrentes nos feitos que a motivaron, tales como natureza da infracción, grao de ntencionalidade e reincidencia así como aqueles factores que poidan considerarse como atenuantes ou agravantes.

*ARTIGO 103.*

A prescrición das faltas producirase:

- INFRACCIÓNS LEVES: 6 meses.
- INFRACCIÓNS GRAVES: 2 anos.
- INFRACCIÓNS MOI GRAVES: 5 anos.

*Disposición final:*

Esta ordenanza entrará en vigor unha vez aprobada polo Pleno da Corporación segundo o procedemento previsto e fose publicado o seu contido na forma e coas condicións que establece o punto 2º do artigo 70 da Lei 7/1985, de 2 de abril, Reguladora das Bases de Réxime Local.

Marín a 21 de agosto de 2013.— A Alcaldesa, Maria Ramallo Vazquez.

2013007627

\* \* \*

## M O S

### **BASES REGULADORAS DE AXUDA MUNICIPAL PARA O USO DO SERVIZO DE COMEDOR ESCOLAR PARA O CURSO 2013/2014 DO CONCELLO DE MOS**

*BASE I.—CRÉDITOS ORZAMENTARIOS*

O orzamento previsto para o financiamento desta axuda, ata o mes de decembro, ascende a contía de 5000 € que se imputará con cargo a partida 321.226.1101 do orzamento de gastos do ano 2013

*BASE II.—OBXECTO DA SUBVENCIÓN*

É obxecto da presente convocatoria regular o procedemento para a concesión de subvencións ás familias do alumnado de educación infantil (segundo ciclo) e educación primaria para o curso 2013/2014 para o uso do comedor escolar dos CEIP públicos do Concello de Mos, sempre e cando este non goce de gratuidade. O outorgamento destas subvencións realizarase en réxime de concorrencia competitiva acorde cos criterios recollidos nestas bases.